

欽定大清會典事例

欽定大清會典事例卷一百三十八

吏部

守制

旗員丁憂 旗員外任丁憂 內外漢官丁憂 內外官員丁憂 通例 新選

新補

官員丁憂 候補候選官員在籍丁憂 無關銓選人員丁憂 起復 匪報丁憂

旗員丁憂○順治十八年題准奉差出征滿洲

蒙古漢軍文官丁憂以回京日守制○康熙五

年議准旗員丁憂即報該管上司取該都統印

結其印結遲延或字樣不符以致往返駁詰稽

遲者罰俸六月或係呈報之員不符或本旗印

結不符將不符之員議處○十二年題准在京

滿洲蒙古漢軍丁憂者。在家居喪百日。後即入署辦事。其二十七月內。遇朝會之期。停其朝會。俟服滿。始令上朝。在外滿洲蒙古漢軍文官丁憂者。令其解任。照漢軍官例。以聞訃之日為始。不計閏守制二十七月。○又題准。

盛京守

陵旗下文官暨各處駐防。並各省督撫布按衙門筆帖式。均照在京滿洲蒙古漢軍文官例守制。○又題准。在京漢軍補授漢缺者。照漢官一例離任守制。○乾隆二年。

諭在京八旗文武各官遇有親喪例於持服百日之後即入署辦事原以旗員人少若令離任守制恐致誤公而伊等在二十七月之內仍各私居持服以自盡其心惟是朝會祭祀之期或有執事或應陪祀之處仍皆一體行走未加分別俾盡孝思嗣後在京旗員有親喪者二十七月之內凡遇朝會祭祀之禮應一概免其行走○又奏准八旗文職官員遇有親喪百日後仍令入署辦事照常支俸以資養贍其二十七月之內凡入朝進署一切公務及進至御前應用吉服時仍用吉服一切朝會祭祀之處皆

免其執事再二十七月內除奉

特旨升用人員其餘遇有升遷停其開列升轉至服滿後較俸之時仍准其算俸至八旗生監舉人進士二十七月內亦停其考試銓選俟服滿後始准銓選考試○五年奏准八旗文職官員如有親喪及服滿者令本人於親故聞訃及服滿之日呈明該參佐領該旗覈實將現任筆帖式以上暨現在候補文職各官於每月三十日截限以前造冊報部其事故在本月三十日以前未及冊報者亦令於下月初五日以前報齊考

試取中並各項候補筆帖式現在註冊應用人員於每月十五日截限以前造冊報部其事故在本月十五日以內未及冊報者亦令於本月二十日以內報齊其

盛京

陵寢等處暨駐防所屬文職旗員如有親喪及服滿者亦令本人於親故聞訃及服滿之日呈明該管官其該管官於本人呈報之日限十日內出咨報部如丁憂服滿文職旗員不即呈報照丁憂呈報遲延例罰俸一年若本人已經呈明該參

佐領暨各該管官轉報遲延皆交部分別議處
○十一年奏准在京旗員為祖父母一體承重
丁憂○嘉慶四年奏准漢軍現任漢缺人員丁
憂照漢官例離任開缺守制二十七月其呈報
丁憂及服滿均照八旗文員例辦理○又奏准
八旗現任及各項候選文職官員筆帖式呈報
丁憂服滿舊例彙冊報部於每月截缺以前報
齊近來各旗俱係本人呈報之後即先用圖片
報部再補印文此內現任人員有關升轉候選
人員有關銓選自應隨時咨報以憑查覈○又

奏准八旗現任及各項候選文職官員筆帖式
呈報丁憂本員於親故及聞訃之日即將應行
丁憂之處照漢官例切實聲敘呈明該參佐領
該參佐領於本員丁憂五日限內先行出具圖
片報部仍呈明該旗於據報十日內咨明吏部
遲延遺漏者查議

尋改定如係候補候選人
昂報丁遲延免其查議

○

又奏准軍營辦事旗員其父母祖父母在京病
故該員例應丁憂承重者不必拘定聞訃回京
即以該員親故之日起守制二十七月服滿回
京後止令穿孝百日治喪者以本生父母病故

之日為始。扣算一年服滿。○十年

諭嗣後凡遇大員丁憂。所有應行請假穿孝及接管印
鑰等事。俱著該管上司及同僚具摺奏報。本人不必
自行陳奏。○光緒十一年奏准京職滿官三品以上
大員丁憂。由本衙門知照吏部註冊。四五品京
堂六品國子監司業內閣侍讀學士翰林院侍
讀學士以下。都察院給事中。各部寺司員以下
等官丁憂。呈報本衙門。咨明吏部。吏部據咨註
冊。均離任穿孝百日。仍回原任供職。其二十七
月內除奉

特旨升用外其餘遇有升遷停其開列升轉

旗員外任丁憂○康熙六十一年議定凡八旗
丁憂官員照例令該督撫速催進京若有錢糧
不清者照例題叅其錢糧清楚者即令依限歸
旗將該員起程日期報部註冊仍取該旗都統
印結報部○乾隆元年奏准外任旗員呈報丁
憂凡一切公務概不准其差委於該員聞計時
詳明督撫即行委官署理飭令交代清楚各按
省分遠近計程定限給咨歸旗將該員聞計暨
起程日期咨部並咨該旗存案該員歸旗後以

在任聞計之日為始不計聞扣二十七月服滿
咨部起復補用至該員未經丁憂先奉差委如
實係緊要公務聞計後勢難別委接辦者令該
督撫將緣由聲明俟事竣後給咨歸旗亦准其
以聞計之日丁憂服滿起用若該員所辦差事
可委員接辦者仍飭令交代清楚勒限歸旗其
歸旗違限者該旗咨部按其遲延月日照領憑
赴任例分別議處儻該員在任並無差委事件
聞計後希圖逗遛鑽營差委或所奉差事已經
委員接受仍故意遲延不行交代者該督撫據

實題。叅照官員聞喪仍行戀職例。革職。各該上司於聞訃之員。不即催令歸旗。復行差委。及不勒令交代。任其藉端留滯者。將差委之上司。照濫委廢官例。降一級調用。○十四年

諭各部院八旗滿洲蒙古官員。凡親喪百日滿後。仍在各本處行走。其用於外任之滿洲蒙古官員。遇有親喪。照例丁憂離任。回京後。亦令守制二十七月。但滿洲蒙古不似漢人衆多。且旗員亦不應聽其閒居。不得當差。嗣後外任滿洲蒙古官員。丁憂至京。已滿百日。後著該旗帶領引見。或於該旗。或於部院。朕酌量

委用○十七年覆准八旗外任官員如有父母在本旗病故者令該家屬於五日內呈報該旗取具印結移咨吏部查明道府以上具題開缺同知以下照例開缺○十九年

諭奉天府府尹鄂寶奏稱題升承德縣知縣富昌現在丁憂承德為奉天首縣現值大差尤關緊要奉省實無合例勝任之人請將富昌留奉任事俟服闋再行送部引見等語丁憂人員自應遵例回旗守制非勢不得已不當因係旗員稍存歧視今奉天現有大差一切錢糧事務均係該員經手姑照該府尹所請准

其在任守制非因旗員回京例得分部。遂可通融辦理也。嗣後不得援此為例。○四十六年

諭向來由內務府官員擢用道府者。丁憂回旗於百日滿後例由總管內務府大臣帶領引見。其包衣漢軍未曾為內務府司員者。遇有丁憂事故。著照八旗漢軍人員之例。仍俟二十七箇月服滿歸部銓選。毋庸於百日滿後帶領引見。著為令。○嘉慶四年奏准八旗外任人員父母在旗病故。該家屬於遭喪卹即呈報該參佐領於本員丁憂五日限內先出具圖片報部。仍呈明該旗於據報十日內取具

旗結七張咨報吏部由部行文該員任所督撫將結六張封發查照該督撫接到部文即飭令該員依限交代離任回旗守制仍將該員聞訃日期咨報部旗○又奏准外任丁憂旗員回旗該任所督撫造具該員家口清冊並起程日期先行咨報部旗遺漏者查議○五年奏准八旗外任官員父母在旗病故丁憂者督撫以下道府以上本旗自行具奏奉

旨後知照吏部毋庸具題照例咨行其同知以下吏部據咨開缺仍入半月彙題○十九年奏准八

旗外任官員如父母在旗病故丁憂者督撫以下藩臬以上由本旗自行具奏請

旨簡放仍知照吏部辦理毋庸再行具奏其鹽運使道府以下等官遇有父母在旗病故丁憂者該旗即行知照吏部據咨開缺如屆截缺之期即先取具圖片報部仍附入半月彙題○二十三年議准旗員百日孝滿奉

旨簡署外任督撫藩臬道府印務者服滿文到部即付文選司將應否實授之處具題請

旨○又

諭通判常山早經丁憂應按限回旗守制乃逗遛省會。又復貪戀署缺著即革職飭令回旗將軍富俊等於丁憂人員不即催令回旗輒藉差務為詞奏請署理興京通判實屬違例富俊等著該部查取職名一併議處。○又奏准八旗外任文職官員如祖父母父母本生父母迎養在署或該員隨侍任所應丁憂承重者穿孝百日回旗後在原衙門行走丁憂承重者自遭喪之日起扣足二十七月期滿治喪者自遭喪之日起扣足一年期滿俱不計閏期滿日呈報起復。○又奏准八旗外任官員聞

計照例離任穿孝百日。回旗見喪時如未滿百日。准其接算。已滿百日者。毋庸再扣。令其在原衙門行走。其有經營祭葬等事。自行呈明該旗都統。給予假期料理。丁憂承重者。自聞訃之日起。扣足二十七月。期滿治喪者。除路程外。以到旗見喪。或奔喪到某處見喪。或中途迎柩見喪之日起。扣足一年。期滿俱不計閏。期滿日呈報起復。○又奏准八旗外任人員。父母於任所病故者。本員於遭喪日。即行申報上司。該督撫據報一面題咨。一面飭令該員依限交代離任。回

旗守制遲延者查議

內外漢官丁憂○原定凡內外漢官丁憂承重者具文報部以聞計之日為始不計閏二十七月終制蒙混具報者丁憂官不准起補該管官罰俸六月○嘉慶四年奏准官員遇閏月丁憂者以下月初一日為始丁憂後續又接丁者以接丁之日為始俱守制二十七月不計閏

內外官員丁憂通例○康熙五年題准凡內外官員丁憂皆開明嫡親父母有無過繼及為祖父母承重者亦開明是否嫡長孫有無伯父及

伯父之予如疏咨結狀互異將混呈出結代報
官罰俸六月若咨結題疏內有一處開明者免
議准其守制○九年議准漢官丁憂即報該管
上司取原籍印結其印結遲延或字樣不符以
致往返駁詰稽遲者罰俸六月或係呈報之員
不符或本籍印結不符將不符之員議處○又
題准官員短喪並聞父母祖父母喪仍行戀職
者革職不准援

赦或假捏丁憂承重事故申報上司者革職其丁憂
未畢出仕就考者與短喪同○又議准相繼丁

憂各官不行申報並裁汰官員聞訃不報即行
回籍者皆於補官日罰俸一年若官員已報丁
憂該管官不行轉報以致部內升選補授者將
不行轉報之司道府州縣等官罰俸一年督撫
罰俸六月如丁憂官未經呈報罪在本官地方
官免議如本官已經呈報地方官未行轉報者
罪在地方官本官免議如地方官已報上司上
司遺漏不報者罪在上司地方官免議○十四
年議准現任官員聞喪不報擅自離任者降二
級調用○雍正三年

諭督撫丁憂者不得遽行送卹其任內文卷擇司道一人代行聽候諭旨方行離任○七年

諭凡為人子者於親喪之禮不得備盡其心實為隱痛朕親身閱歷而知之故於內外大小臣工有不得已令其在任守制者乃因辦理政務從權之道未嘗不體其哀戚之情也如大學士朱軾蔣廷錫丁母憂皆給予假期回籍料理及來京之後仍令素服辦事不穿朝服不與朝會筵燕俾得盡其守禮之心其外任官員或特旨留任或經督撫題留者皆著給予假期令其回籍料理伊親之事畢而後回任今思此等官

員既回原任則職事之內凡遇應行之典禮若照常
齊集其心必有不安若本身不到又恐曠誤被人指
摘其勢實處兩難不知令其在任守制者原以要缺
需才一時無可更替故令視事以資實用不得於儀
文禮節之間強其心之所不安也嗣後內外大小官
員若有奉旨在任守制者皆准其素服二十七箇月
以盡人子之心若遇朝賀燕會祭祀典禮齊集之處
外省督撫提鎮司道府大員則委屬員代行州縣等
官則委佐貳代行再如直省文武官員或遇朝賀典
禮齊集之處僅遇風寒之疾或肢體等患亦不宜勉

強從事。有乖調攝之道。亦著屬員等官代替行禮。其代替之處。督撫提鎮則報明禮部。司道副參以下等官則報明督撫提鎮。著將此旨通行各直省知之。○十年覆准。直隸各省地方等官。無論有無軍需辦理如遇丁憂於聞訃日即行呈報上司。仍令暫行視事。該上司即委員速赴交代。如委員未到。素服視事。若遇典禮齊集。委屬員代行。俟委員到任後方准丁憂之員交印離任。如該員已經呈報丁憂。該上司不即行委員者。罰俸六月。如委員不即行赴任接受交代者。罰俸一年。○

乾隆二年覆准丁憂官員回籍守制除因喪事
與人往來外如有親赴省城更易服色干謁地
方官並送禮赴席者指名題叅將該員於補官
日降三級調用○十三年

諭督撫丁憂不得遽行送印任內文卷擇司道一人代
行聽候諭旨方行離任此定例也今據湖廣總督新
柱奏報湖南巡撫楊錫紱丁憂按照前撫趙宏恩之
舊案將印信交與布政司護理在楊錫紱之意不過
以守制為重欲博盡孝之虛名耳不思定例既有司
道代行一切政事自可毋庸分心於盡孝之道兩不

相妨而巡撫責任封疆印務關係重大定例候代殊有深意趙宏恩所行豈可援以為例即如吳同仁一聞母病棄官而歸經督撫叅劾朕以其尚知子道格外寬免今乃以賄託薦舉敗露好名究何益耶嗣後督撫俱著遵例行有似此者以違制論○十七年覆准現任各官其父母有在籍病故者該家屬取具鄰族甘結於五日內呈報本籍州縣該州縣加具印結於五日內徑詳督撫督撫分別題咨並即移咨任所知照該員令其離任仍將該員聞訃日期咨部扣算年限起復其在京各官有

父母在原籍病故者向無督撫具題之例應令
原籍督撫亦於定限內取具印結咨部由部分
別題咨開缺至京外各官有本員聞訃日期在
先各該督撫移咨在後者仍以本員聞訃日期
咨部開缺再外任官員有父母迎養在署該員
因公出差父母在任所病故者令家屬依限呈
報由任所督撫分別題咨吏部查照開缺仍令
該督撫一面行文出差處所及原籍地方查取
印甘各結並該員聞訃日期咨部查覈○二十
九年

諭御史秦燾以戶部郎中馮光熊刑部郎中杜玉林俱

係丁憂之員該堂官不應奏留一摺內稱若遇升外
任又未聞以幹練留部其持論實中事情即該堂官
等亦無辭可對官員遇有事故並聽離任終制原係
恤下常經朕自臨御以來於臣工進退一切皆循定
例閒有特旨令仍在任署事者本屬寥寥無幾第以
堂官而請留司員督撫而請留屬吏則上官之推情
瞻顧與下僚之因事干求其流弊將何所不有況國
家分職任本豈必少此一二人與此一二人二三年
少待之期而必權宜破格而為之誠亦可以不必嗣

後凡朕特旨酌量令其留任外內而部院堂官外而督撫等均不得率行請留著為定例○又覆准凡直隸等省州縣官如遇丁憂其該管知府係同城者該府即就近收取印信暫行兼理如該管知府不同城者該府先即揀委比鄰之州縣或廉明素著之丞倖暫為代理印務該管知府仍即日申詳督撫剋期委員署理如上司不即委員署印該委員不即赴任仍照定例議處○三十年

諭據楊應琚奏甘省蘭山書院於去歲延請丁憂在籍

之府丞史茂來主講席一摺此甚非是史茂係回籍
守制之員理應閉戶家居以盡三年之禮至讀禮之
餘或在家訓課子弟自屬分所應為古人尚有廬墓
終制者即不能取法亦當杜守里門若竟住居省會
書院教授生徒與地方官長賓主應酬則與居官何
異此不過冀得膏火以資膳給遂置禮制於不問微
特人子之心難安其又何以為多士表率乎督撫有
維持風化之責搢紳中績學砥行足備師資者諒不
乏人何必令丁憂人員覲居講席是應聘者固不能
以禮自處而延請之地方大吏亦復不能以禮處人

於風化士習頗有關係恐他省不無類此者特為明切曉示通諭知之○三十一年

諭嗣後凡調取引見人員內有現經丁憂者該部詳查聲明扣除俟該員服闋後補行引見如有特旨不拘事故即令引見者不在此例著為令○三十三年

諭御史曹學閔奏熊學鵬於丁憂後拜發奏章一摺所見拘墟於事理無關輕重各省督撫大吏設有徇私翫法御史列款糾彈者如其事屬實朕必深為嘉許若其人適遇丁憂事故一切經手案件及交代印篆日期不得不具摺奏聞乃情理所應有而必斤斤

較量於拜摺衣冠儀節之間。遽指為忘親不敬。正所謂吹毛求疵於國家政務。有何裨益。明季言官陋習。專務摭拾浮文。陽博建言之名。陰行箝制之計。使封疆大吏。望風生畏。內外官僚。動成水火。最為弊政。此種狡猾伎倆。輕為嘗試。不可不防其漸。曹學閔著飭行。○又題准。現任官丁憂。伊父母在任在籍病故。取本員供結轉報。停止同官出結。○嘉慶四年奏准。官員呈報丁憂。取具親供。及族鄰甘結。聲明親故月日送部。並開明係屬親子。並無過繼字樣。丁外艱者。將父係何名。有何官職。丁內艱者。

將母係何氏或生或繼逐一開明遺漏錯誤者查議○又奏准官員之親在任所病故者該員於遭喪日起限五日內呈報聞訃丁憂治喪者於聞訃日起限五日內呈報在籍病故者該家屬於遭喪日起限五日內呈報州縣官在外病故者隨侍之員或家屬於遭喪日起限五日內呈報病故處所州縣官州縣官據呈確查均限五日內轉詳京官丁憂治喪者於親故或聞訃日起限五日內取具同鄉官印結由本衙門呈報本衙門於據報五日內咨報吏部逾限者查

議○又議准官員接丁者應於接丁日取具親
供族鄰甘結報部遺漏者查議○又奏准各省
府州司道遇有官員呈報丁憂治喪起復應行
覈轉之案於申詳到日各限十日轉詳逾限者
查議丁憂官員原籍督撫於申詳到日限十日
內分別題咨報部並行知本員任所飭令丁憂
○又奏准各省督撫地方官遇有呈報官員丁
憂起復因供結未協駁飭另換者應將該員丁
憂及服滿日期按限先行咨部如有遲閤查明
係何官遲延即將遲延職名送部議處○又奏

准丁憂官員任所督撫於該員原籍行知或奉部文知照到日即飭令該員丁憂毋庸具題仍取具本員聞訃親供咨部如丁憂之員親故於任所例應具題者仍按限具題○又奏准官員丁憂起復俱憑月日扣算查覈本員呈報供結及督撫等申詳題咨於年月日數目等字俱應書作壹貳叁肆伍陸柒捌玖拾字樣以杜書吏添改之弊違者查議○又奏准現任地方官丁憂自遭喪日起限三箇月交代清楚起程回籍守制將起程到籍各日期分別報部在外聞訃

丁憂官員到籍時將到籍日期報部並將何日起程於文內一併聲敘或因患病不克起程准其將患病展限緣由先行咨部俟病痊起程時仍將起程日期專案報部遲延遺漏者查議○又奏准官員由寄籍呈報丁憂者查係先經入籍該省報部有案准其在入籍省分守制聞訃丁憂者於報丁呈內將業經入籍及由入籍省分飭取族鄰甘結緣由切實聲敘俟該員到籍時即由入籍省分報明到籍如未經入籍有案者概飭令回祖籍守制○又奏准官員承重祖

父母者惟本身及其父俱係嫡長而父先故始應承重丁憂二十七月如父係庶長即不必承重丁憂或父係嫡長而本身係屬庶長亦毋庸承重丁憂俱令嫡次承重無嫡次始令庶長承重丁憂二十七月○又奏准官員承重丁憂應開明係嫡長孫並無伯父及伯父之子字樣如係曾祖父憂應開明並無伯祖伯父及伯祖伯父之子字樣遺漏錯誤者查議○又奏准緣事發遣問徒廢員呈報丁憂者在配所守制不准回籍○五年奏准欽天監官生太醫院醫官丁

憂均不開缺離任俱穿孝百日進署當差仍停俸三月停升二十七月如籍隸外省人員酌量給假回籍守制○又奏准京官三品以上大員丁憂由本衙門具奏開缺知照吏部四五品京堂六品國子監司業丁憂具呈本衙門咨明吏部吏部據咨將員缺另行開列請

旨簡放其丁憂之案仍入半月彙題內閣侍讀學士翰林院侍讀學士以下都察院給事中各部寺司員以下等官丁憂呈報本衙門咨明吏部吏部據咨開缺仍入半月彙題由本籍報明親故

丁憂者應令本籍督撫分咨吏部及本員供職衙門以便各該衙門題咨辦理。○又奏准外任道府州縣等官丁憂由任所督撫具題開缺州同以下等官丁憂由任所督撫咨部開缺仍均入半月彙題。○道光元年奏准官員本身係屬庶出生母早故父令別妾撫養者謂之慈母病故時准令離任丁憂二十七月仍於報丁文內聲明生母係何姓氏慈母係何姓氏取具親供甘結報部如有假捏照例議處其尋常報丁及起復文內仍毋庸聲敘有無慈母以免查駁。○

九年奏准現任京官丁憂治喪者於親故或聞
訃日起限五日內取具同鄉官印結由本衙門
呈報本衙門於據報五日內咨報吏部如該員
親故或聞訃之日適遇本部截缺之期應令該
員於丁憂之次日呈報本衙門該衙門於即日
先行白片咨報吏部開缺其同鄉官印結及該
衙門印文仍限五日內報部遲延者查議其有
事故在二十日以前白片遲至二十日以後到
部者如在二十四日吏部未經過堂之先其員
缺仍應勒歸本戶即時移付文選司開缺並查

取遲延職名議處至各衙門候補候選人員業已見缺可補者亦照此例辦理○又奏准官員之生母被出病故時准令離任治喪一年不計閏○又奏准官員係抱養周歲以後遺棄小兒本宗無考即從其姓出仕者遇養父母病故治喪一年○又奏准外官現任候補各員因差來京遇有親故見喪或聞訃者於見喪或聞訃日起限五日內取具同鄉京官印結赴吏部呈報有關開缺者吏部據呈即行開缺如現任候補之員不行呈報徑自回籍及逾限者均照例察

議候補人員尚未見 ○又奏准現任鹽運使道

府同知通判州縣等官丁憂由任所督撫具題

開缺如親在籍病故或由原籍督撫具題開缺該督撫獨轄到部或該家屬取具同鄉京

官印結在部呈報州同以下等官丁憂由任所

督撫咨報吏部開缺如親在籍病故或由原籍督撫咨報吏部開缺或該

家屬取具同鄉京官印結在部呈報仍均入半月彙題

新選新補官員丁憂○乾隆七年奏准凡新選

新補內外官員在京聞訃及父母在京病故者

皆取同鄉京官印結呈報丁憂准其守制仍行

令原籍地方官出具印結報部○嘉慶五年奏

准凡在籍新選縣丞雜職等官該督撫於部發
文憑到後有呈報丁憂終養等情該地方官詳
加確查出具並無假捏印結報部開缺僅報部
之後有假捏情弊別經發覺者將捏報之員照
規避例革職出結之地方官照徇情例降二級
調用○又奏准在京新補放銓選道府及現任
道府之父母在京病故呈報丁憂者在吏部呈
明吏部先將員缺請

旨簡放或開缺按班銓補其丁憂之案附入半月彙
題

候補候選官員在籍丁憂。○康熙六年題准。凡在籍官員丁憂。令該地方官申報督撫。督撫報部註冊。如有遲延不報者。查叅。○乾隆二十年議准。候補候選官員丁憂。限一月內令州縣確查取結。加結徑詳督撫衙門報部。○二十四年議准。候補候選官員呈報服滿。照報丁例。於一月內取具詳明妥結。徑詳督撫衙門移咨部科。起復仍報藩司及該州縣備案。○二十五年議准。服滿起復。候補候選人員文結一體由司覈詳請咨。○三十年議准。官員呈報服滿。經該地

方官查明係屬應補人員即於起復文內將候補字樣一併填明咨部鈐用僅於起復文內不填明候補字樣或先給赴補咨文不將該員服滿文結送部將該地方官指名叅處至丁憂服滿候選各員如有先給赴選咨文不送服滿文結者一體叅處○三十三年題准在籍候選官員丁憂起復地方官可據供結覈報毋庸加具印結○嘉慶四年奏准在部候補候選候挑人員父母在籍病故該員接信聞訃者就近取具同鄉京官印結於聞訃五日內赴吏部呈報逾

限者查議。○五年奏准候補候選各項大小內外官員丁憂無論何項官階俱照例咨覆毋庸彙題。

無關銓選人員丁憂起復。○乾隆十四年議准捐職人員例不銓選與應補應選人員不同捐納州同等職銜人員遇有丁憂事故按季彙報捐納道府郎中等職銜者事同一例亦一併彙入季報案內造報。○嘉慶四年奏准凡未經就職之舉貢生監及各項

欽賜議敘捐納虛銜均係無關銓選人員遇有丁憂

服滿之期毋庸專咨覈覆俟各該督撫彙咨到
中據冊移知文選司禮部存案

匿報丁憂○嘉慶十五年

諭原任廣東莞縣縣丞陳謨父母在籍先後病故事
間六年匿不呈報著即革職交該撫廣厚親提至省
並同一千人證嚴行審訊按律定擬具奏○同治三
年

諭已革前署懷來縣知縣錢葆延之父錢埴病故伊胞
兄錢寶廉已在湖南學政任內丁憂該革員因伊父
名字卽鈔傳寫誤作錢鹽是以未報丁憂錢寶廉丁

憂曾經湖南巡撫聲明係錢垧親子該革員乃因一字之訛藉口懷疑已見明文延閣月餘俟家信到時始行呈報顯係有心蒙混希圖戀棧錢葆延業經另案革職著永不敘用以示懲儆○十年

諭

曾壁光奏審明劣員丁憂捏報出繼隱匿親喪請革

職治罪一摺貴州補用同知謝邦鑑上年在黔聞訃丁親母仝氏憂該員並不據實呈明輒敢希圖短喪捏報丁本生母童氏憂將親母仝氏捏作嗣母呈報尚存並將親父新美捏作嗣父其所稱本生父新成及病故現報丁憂之本生母童氏並無其人實屬喪

心作偽貌法忘親情節甚為可惡謝邦鑑著革職永不敘用從重發往黑龍江充當苦差遇赦不准援減以昭炯戒

欽定大清會典事例卷一百三十九

吏部

守制

為本生父母繼母及庶祖母治喪
止在任守制官員起復服滿起文

赴部程限

為本生父母繼母及庶祖母治喪○康熙三年題准內外官員出繼為人後者遇本生父母之喪自願回籍治喪者京官具呈到部具題外官督撫具題除水陸路程外定限一年限滿起文赴補○十二年題准官員為人後者遇本生繼母之喪情願治喪者亦照生母例給假○乾隆

二年覆准內外大小官員出繼為人後者。遇本
生父母之喪。概令回籍治喪。除水陸路程外。定
限回籍一年。起文赴補。在京各官。取具同鄉京
官印結。中書以上等官。呈部具題。其餘各官。呈
部註冊。在外官。取具原籍印結。知縣以上。督撫
具題。其餘各官。咨部註冊。又在京候補候選。在
外試用等官。遇有本生父母之喪。亦令取結具
呈回籍治喪。一年限滿。起文赴部補用。如有匿
喪不報者。照匿喪例革職。其無喪詐稱有喪。舊
喪詐稱新喪。希圖規避者。照捏喪例革職。○五

十年議准父之生母病故父已先故又無父之同母伯叔及父同母伯父之子者治喪一年○六十年議准嗣後遇有嫡祖母在其父早故父之生母病故如無伯父及伯父之子者仍令治喪一年如嫡祖母已故其父亦早故迨父之生母病故並無伯父及伯父之子者概令承重丁憂三年○嘉慶四年奏准官員生祖母係屬庶室病故時其父先故別無父同母之伯叔本員於生庶祖母為長孫者無論嫡祖父是否現在概令治喪一年○又奏准官員出繼報丁所後

父母憂者應開明係何時過繼為嗣例應丁憂
字樣報治本生父母喪者應開明係何時出繼
與何人為嗣例應降服治喪字樣遺漏錯誤者
查議○又奏准官員出繼為人後者本生父母
迎養在署或隨侍在外病故者依限呈報治喪
以親故之日為始治喪一年仍依限回籍將到
籍日期報部聞計者依限呈報回籍治喪以到
籍之日為始治喪一年在籍聞計者以聞計之
日為始扣滿一年限滿呈報起復○又奏准旗
員出繼為人後者本生父母病故自遭喪及聞

計日起治喪一年。限滿呈報起復。○道光四年
議准。官員丁親父母憂期內。遇有出繼胞伯叔
及堂伯叔者。查無別項不合例之處。即准其出
繼。為其親父母終制二十七月。其於丁嗣父母
憂期內呈請歸宗。為其嗣父母終制二十七月。
均不計閏。○又議准。官員甫經出繼。即報治本
生父母喪者。查其本生父母病故日期。在出繼
咨文到部之後。照例治喪。如在咨文未到部之
先。無論嗣父母是否現存。仍應丁憂二十七月。
不計閏。○又奏准。官員身係獨子承祧兩房者。

如同傳小宗。於所生父母病故。丁憂二十七月。
於兼承宗桃之父母病故。治喪一年。○又奏准。
官員係一子承桃兩房。如大宗獨子承桃。次房
者。遇本生父母病故。丁憂二十七月。次房承桃
父母病故。治喪一年。如次房獨子承桃。長房者。
遇本生父母病故。治喪一年。長房承桃。父母病
故。丁憂二十七月。○又奏准。官員係小宗子。先
經出繼小宗。嗣經兼桃二房者。如已為所後父
母丁憂持服。遇所生父母病故。治喪一年。如兼
桃時尚未為所後父母丁憂持服。遇所生父母

病故。守制二十七月。為兼祧父母治喪一年。均
不計閏。○又奏准。官員係承祧兩房獨子之子。
雖已分祧。遇父母病故。均守制二十七月。不計
閏。○又奏准。官員係獨子之子。分承兩房宗祧
之孫。遇祖父母承重之喪。嫡孫均為其祖父母
守制二十七月。不計閏。○同治十二年。奏准。官
員小宗兼祧大宗。與以大宗兼祧小宗者。均以
大宗為重。於大宗生庶祖母病故。其父先故。治
喪一年。於兼祧小宗生庶祖母病故。兼祧父先
故。飭令解任持服小功。

謹案功服向不解任。惟
此服情由義起。無論京

外各官均飭令回籍分別治喪持服期滿日取具本員親供族鄰甘結咨報到部准其起復

停止在任守制○雍正十三年

諭

父母之恩昊天罔極而喪禮以三年為斷者所以節
仁人孝子之哀而使有所極也三年之喪猶不能終
則百行皆無其本矣魯公禽父衰經而即我孔子以
為有為為之也古者諸侯之大夫士雖有既葬而服
國事之禮然古之仕者不出其鄉殯殮皆親窆窆既
營雖使經而即事義尚可安也今之仕宦近者有數
百千里舍斂不知宅兆未卜而晏然於官所情能自
已乎往者道府以上要員閒有督撫保題在任守制

而特旨從之者。其後遂習為故常。並及州縣微員。其
中有平日督撫所親信而欲留者。有竟自願留者。有
多方營求以得之者。而不得者且用為恥。夫事親孝。
故忠可移於君。使其人本仁孝而強奪其情。則儻然
不能終日。必至愴恍昏迷。廢弛公事。若以為安。則忍
戾貪冒之人也。國家安所用之。而所治士民亦安能
服其政教乎。自後必其地其任其事其時。決不可少
是人。而無能相代者。方准保題。以憑覈奪。餘皆停止。
永著為例。○乾隆三十七年題准。丁憂人員俱責令
該管上司。於交代完日。勒限三月起程。原籍督

撫將回籍月日報部。不准在原居官省分寄住。如有逗遛。將本員照旗員議處。該管官及該上司。照容留旗員例議處。其有經手未完工程等件。必須該員留辦完結。今該督撫將不能遽令回籍。或應展限之處。於咨內聲明。以憑查覈。○四十九年議准。丁憂人員。如有承辦緊要事件。暫令留省差委。俟事竣日回籍守制。不准留省。

○五十年

諭。前據何裕城奏請將丁憂知縣王垂紀留辦西安城工一摺。已批所奏不可行。諭該撫即飭該員回籍守

制。昨又據富綱奏請以丁憂雲州知州宋昌瑒接辦甯臺廠務。亦批不必。令另選合例之員具奏矣。奪情起復。非所以教孝敦倫。古人惟於軍旅之事。偶一行之。若地方遇有不靖。如撒拉爾逆回等事。軍務緊要。其承辦軍需之各州縣。設遇丁憂。該督撫自不妨奏請權令在任守制。至城工廠銅。非軍務可比。何必須一人始終經理。而為此破例之舉。設使其人病故。又將何如。豈必待起死回生。而後可不致乏員辦事耶。大抵該督撫之為此奏。非徇情市恩。即係該員干求請託。並非專為地方政務起見。徒令此等在任守制。

之員。坐擁廉俸。戀職忘親。轉藉王事羈留。不得稍盡人子之禮。資為口實。於官方政化。俱有關係。著通飭各省督撫。嗣後非遇軍務。不得以丁憂人員。奏請留任。著為令。○嘉慶四年。奏准官員丁憂後。奏留任所工所。及一切承辦事務處。奉

旨允准者。即在奏留處所守制。毋庸回籍。服滿時。准於原奏留地方起復。仍查取原籍族鄰甘結備案。其非奏留者。概不准行。飭令差竣回籍。由原籍呈報起復。○八年

諭。吳熊光奏原任施南府知府周季堂丁憂留營。現已

服闋請送部引見等語。周季堂在楚有年。前因委辦軍需。未便驟易生手。特降旨將周季堂留營效力。現在大功告竣。該員已屆服闋。呈請起復。若遽行赴部補官。為人子者。於心究有未安。著吳熊光給咨周季堂回籍補行穿孝。看視墳塋。不必限以月日。即由本省起程來京引見。此外在營丁憂文武各員。目今已無經手緊要事件。其未經服闋者。均令其回籍守制。將來照例起復。其已經服闋者。於軍營給咨。先回本籍補行穿孝。均不必限以月日。赴部補官。以示體恤。

○又

諭勒保奏查明川省節次奏留承辦軍務丁憂人員。分別開單進呈一摺。川省自軍興以來。因辦理軍需。先後奏留丁憂文員。共一百餘人。現在大功業已告竣。自應查明分別辦理。著照所請。綏定府知府劉佳琦等二十六員。均係早經服闋。准俟經手事竣。有告假回籍者。暫行給假。毋庸開缺。候補道石作瑞等五十員。經手軍需尚未完竣。著仍留川省清理經手事。俟服闋後。各按本班挨次補用。如該員等於經手事竣。後有呈請省墓者。准其給假回籍。有情願赴部候選者。准其隨時呈明辦理。候補知州劉有儀等二十

員。現無經手事件。著即回籍穿孝。服闋後。照例仍回原省補用。候補知府鄒翰等十一員。現在請咨回籍。該員等辦理軍務。著有微勞。俟起復時。著由原籍咨部。加恩各按本班遇缺先儘補用。○九年

諭。此項人員。其服闋已久。現補實缺者。應准其給假百日。回籍補行穿孝。毋庸開缺。假滿後。即回本任。其未經補缺。丁憂尚未服滿。及曾經實授。丁憂奏留之員。均以次令其回籍穿孝。該員等服闋後。仍須回原省候補。但從前軍務需人之時。所留人數。未免過多。今軍務既竣。該員等回陝後。人多缺少。轉致補缺無期。

且各員中亦未必皆係實在得力務須留陝之人。著再行詳查。將經手事多。熟悉地方情形之員。留陝補用。其餘或咨部候選。或分掣鄰省。以免壅滯。至丁憂後曾經告假成服。及有次丁回籍經理。並投效奏留各員。除承辦事件繁多者。毋庸飭令回籍外。其餘仍應聽其回籍守制。以示體恤。○十一年

諭。奏行簡奏雲南運銅委員譚明禮在途丁憂。現派員迎往接運。恐盤兌需時。請令丁憂之員。隨接運之員一同到京。俟交盤清楚。再令回籍守制等語。所奏殊屬非是。運解銅鉛官員。在途丁憂。派員接運。定例將

所運銅鉛交收清楚。方准回籍守制。如有虧短。接運之員。原可據實揭報。責令賠補。於公務私情。兩無妨礙。今表行簡。欲令丁憂運員。隨船到京。交兌銅鉛。是轉類於奪情。非所以示體恤。所有丁憂運員。譚明禮著該署督行。令接運之員。盤驗結收清楚後。即飭令回籍守制。○十三年

諭職官丁憂。例應回籍守制。而近日竟有夤緣督撫。藉幫辦事務為名。稽留本省。希冀該省有保奏機會。為之列入薦章。此等人員。遭父母之事。不思歸里。尚然出入衙門。干預公事。實屬忘本。而且營私奔競。其端

斷不可開。嗣後各省官員。於丁艱後。即飭令將經手事務。作速完竣。回籍守制。如延挨不行。交該督撫驅逐出省。儻再有不遵者。即行叅奏。至河工軍營。如有應留熟手。該督撫亦須當時奏明。不得私自准留。日後藉端保奏。以杜奔競。○又

諭丁艱人員。自應回籍守制。况河工及地方工程。更非軍營可比。何得藉詞奏留。近來丁憂人員。夤緣請託。以及督撫等市恩取巧。率請奏留者甚多。實屬違例。試思此等人員。若由督撫勉強羈留。則該員等遭父母之事。方寸已亂。焉能照常辦工。若係該員等自願

留省。便於鑽營。是於父母喪葬等事。且置之不顧。此等忘本之人。又安望其移孝作忠。為國宣力乎。嗣後督撫等。概不得再以河工及地方工程為詞。將丁艱各員違例奏留。○十五年

諭吏部叅奏留粵以知縣升用之原任浙江嚴州府經歷高颺。於九年丁憂後。即隨德楞泰赴臺。撤兵後。復隨至清江。閱看河工。事竣。復同回京。十一年又隨赴陝西。十二年遣人回籍呈報服滿。又復來京。由天津航海。以至遭風。隨入廣東。得邀議敘等語。該員惟知奔競營求。希圖邀幸。是其忘親不孝。直不知丁憂守

制為人子至情根本之地已虧實屬有傷風化高賜
著革職發往烏魯木齊以為匿喪干進者戒○十六

年

諭外省官員丁憂離任原應在籍守制從前並降有諭
旨不准各督撫藉詞奏留以杜夤緣嗣後各省督撫
如再有將丁憂未經服闋人員率請奏留者定當交
部嚴議○十七年

諭趙堂奏留之案雖在例前該員本非河員出身又未
奉有札調乃不在籍終制輒赴工投效實屬忘本夤
緣趙堂著交部照例議處其違例奏留之現任湖廣

總督馬慧裕一併交部照例議處。○道光四年奏准。外任滿漢官員丁憂。業經於限滿時呈請給咨。其在省具呈者。該上司限十日內給發。在各府州縣具呈者。該地方官限十日內轉詳。該上司於文到十日內給發。飭交地方官轉給。其轉詳轉給往返程限。均准其聲明扣展。如有遲延。令該督撫於咨部文內據實聲明。將具詳之地方官給發之上司。違限不及一月者。罰俸六月。一月以上者。罰俸一年。兩月以上者。降一級留任。三月以上者。降一級調用。本員免議。儻該督撫

並未聲明以致本員誤被降革除本員開復外
仍將具詳給咨之員議處並將漏未聲明之上
司照誤揭屬員例議處○七年

諭給事中程德潤奏請飭丁憂官員遵例回籍守制一
摺我朝孝治天下凡屬丁憂人員非有重大事務從
不奪情起用回籍到籍俱有例限遲逾逗遛悉干吏
議原欲求忠臣於孝子之門俾為人後者皆得廬墓
祭掃遂其烏鳥私情若如該給事中所奏近日丁憂
官員多不回籍守制每藉口營葬無資向督撫大吏
干謁求助各省皆然而有洋商鹽商地方尤甚非授

意屬吏。即勒派商人。紛至沓來。爭先恐後。實有關於
人心風俗。更或於丁憂後投效河工軍營者。尤屬違
例。均應一體查禁。著直省各督撫查明現在丁憂官
員。無故不即回籍。逗遛他省。俱著飭令回籍守制。有
不遵功令者。即據實叅奏。僕相率徇隱。別經發覺。必
當將該督撫一併交部嚴議示懲。以崇孝治而維風
化。○又奏准。官員由祖籍呈報丁憂者。即在祖籍守
制起復。由現籍呈報丁憂者。即在現籍守制起
復。毋庸咨駁。但不許跨占兩籍。以杜弊混。○咸

豐九年

諭

近來各省紛紛奏留丁憂人員。難保無夤緣請託之弊。貪榮忘親。於人心風俗。殊有關係。嗣後軍務省。分除管帶兵勇打仗出力。實為軍營必不可少之人。准其奏留差委。並就近起復。俟軍務告竣。仍飭令回籍。分別補行守制。穿孝外。其餘辦理糧臺文案。勸捐團練。抽釐等項差使。均不得將丁憂人員請留差委。其業經奏留丁憂。並就近起復人員。著統兵大臣。及各省督撫。嚴行裁汰。飭令回籍守制。穿孝。不得以經手事件未完為詞。再行瀆請。其從前未在軍營。丁憂後始行調往。及業經回籍奔喪。復藉詞游幕探親。投效。

軍營奏留差委者亦概不准行。以杜鑽營。至軍務告竣省分曾經奏留丁憂人員尚未服闋者。即飭令回籍補行守制。已經服闋尚未回籍奔喪之候選候補及曾經補缺者。即飭令回籍補行穿孝百日。已補缺者毋庸開缺。以符舊制。以上應回籍各員未經回籍之先均應停其升調選補。並責成統兵大臣各省督撫認真詳查。分咨部科及該員本省督撫以備查覈。如仍逗遛在省在營有營求差委干預公事等情別經發覺將本員照例革職不即查叅之大臣督撫亦照例議處再軍務省分奏留人員多有就近起復後

並未回籍穿孝。即行改捐。並指捐他省者。尤屬有心取巧。著由服官省分之督撫查明。飭令回籍補行穿孝。其尚未分發者。俟補行穿孝後。方准分發。至實任人員。遇有丁憂。例不准請留本省。其丁憂差委人員。即打仗出力。亦不准請署實缺。以前業經奏留者。事竣後。仍飭令回籍補行穿孝。以重倫紀。而肅官方。○又奏准。河工官員。緣事革職留工。有修守汛限者。限內遇有丁憂。給假百日。回旗籍經理喪事。假滿。仍赴河工協修。汛限滿時。令該河督聲明報部。分別覈辦。如有丁憂回旗籍後。有革職赴

工賠修協修者。俟百日後。即飭令赴工。如丁憂尚未起程。適有革職賠修協修者。亦給假百日。回旗籍經理喪事。假滿赴工。其被議不致革職及革職而未奉

特旨賠修者。仍照例回旗籍守制。概不准違例留工。
○同治六年

諭。御史汪朝榮奏。官員營求奪情。請明定限制。一摺。據稱近來外省道府州縣。及隨營人員。一經聞訃。往往百計營求。為奪情之舉。請飭嚴禁等語。軍興以來。需才孔亟。各省帶兵大員。及各督撫。間有聞訃丁憂。特

旨奪情諭令移孝作忠者。雖各該員懇辭再四。而朝廷倚畀正殷。不得不溫諭慰留。為一時權宜之計。其軍務省分帶兵人員防勦喫緊。經各督撫奏請奪情。亦每俯如所請。俟軍務告竣。再行守制。事非得已。禮本從權。至如該御史所奏。隨營糧臺文案各員。及非軍務省分之道府以下各官。豈得概從一律。嗣後除帶兵人員實係防勦喫緊。仍准由各省督撫奏請奪情外。其餘隨營糧臺文案各員。及並非軍務省分之道府以下各官。該督撫不得概行奏留。以示限制。

官員起復○順治初年定。凡起復官員。在籍守

制者。服滿。由該地方官起送。○康熙三年題准。官員丁憂。如不能回籍。依墓守制者。服滿。由寄居地方官起送。○九年題准。地方官如將革職之官。不詳查明白。給結起復者。罰俸一年。○十二年題准。在外滿洲漢軍丁憂官員。服滿。具呈該部。統報部起復。○乾隆十六年議准。各項吏員。彙報丁憂服滿。將該員著役衙門。考職年分名次。及曾否截取。有無遵例報捐之處。一併聲明咨報。以憑註冊。○二十四年議准。官員丁憂服滿者。該督撫即於起復文內。聲敘何年月日。

咨部報丁。或彙入何年分冊報。抑或報明禮部之處。詳細分析。以便歸案速結。○嘉慶四年奏准。地方官丁憂。不得於原任地方。藉詞依墳守制。任意逗遛。竟不回籍。違者查議。○又奏准。官員丁憂守制。二十七月滿日。即取具本人親供。族鄰甘結。聲明起復。由祖籍取結報丁守制者。仍由祖籍呈報服滿。由寄籍取結報丁守制者。仍由寄籍呈報服滿。咨文到部。查無違礙。俱准其起復。僮不由原籍守制地方呈報者。概不准起復。仍飭令照例另報。○又奏准。官員服滿文。

內並未取有親供族鄰甘結者。不准起復。應令補取到日。再行銓選。○又奏准。官員自丁憂後。直至服滿。尚未回籍者。不准起復。仍飭令回籍具報。並查取違例職名議處後。再行銓選。如已報到籍。屆服滿時。適又游幕探親。就醫外出。或因患病未回。曾經咨部展假。屆服滿時。尚未回籍。准該員就近。或該家屬代將服滿日期。先行具報咨部。仍俟查取原籍族鄰甘結。該員親供到日。再准其起復銓選。其有到籍遲延。及回籍遺漏未報。僅於服滿文內聲明到籍日期者。文

到之日。先准其起復銓選。仍查取遲延漏報職名議處。○又奏准。官員丁憂。聲明親故月日。實係親子。並無過繼。承重之員。聲明實係嫡長孫。並無伯父及伯父之子。出繼之員。聲明何時過繼。治喪之員。聲明出繼何人。以上均關緊要情節。如報丁時未經聲敘明晰。服滿文到部。應暫停起復。仍令聲覆到日。再准其起復銓選。至服滿文到部。查無呈報丁憂原案。及報丁供結者。不准起復。仍令補取到日。並聲明漏報緣由。及漏報職名議處後。再准其起復銓選。○又奏准。

官員呈報服滿。有因報丁遲延。先經駁查。尚未咨覆者。應分別辦理。如原係現任。及分發試用之員。報丁遲延者。服滿文到部。未便准其起復。仍俟飭查咨覆緣由到日。將遲延職名議處後。再准其起復銓選。如原係在籍候補候選之員。報丁遲延者。此等人員。尚未得官。無關實缺。且多有游幕外出。以致遲報。應按其遲延久暫。如遲僅數月者。服滿文到部。應一面准其起復。一面飭查遲延緣由。如遲延在半年以外者。服滿文到部。未便先准其起復。仍俟飭查聲覆到部。

覈議後再准其起復銓選。○又奏准官員接丁如於前喪未滿期內接丁者聽其將兩次服滿起止月日於呈報供結內聲敘明晰併案報部。如接丁在前喪屆滿後即應將前次服滿先行報部不得俟接丁期滿一併呈報違者查取遲延職名議處後再准其起復銓選。○又奏准官員丁憂服滿咨文內聲明已取具該員親供甘結出咨時遺漏未經送部或因供結不妥駁飭另換者服滿文到部應先准其起復銓選仍查取遺漏舛錯職名議處至官員呈報服滿如扣

算月日不符。大相懸異者。不准起復。仍令查明不符緣由另報。並職名送部議處。後再行銓選。如供結內有一處與原案相符。即查照議准。或係小有舛錯。不符僅十日以內者。即查照報丁原案日期。扣算更正。准其起復。免查職名。○又奏准八旗現任及各項候選文職官員筆帖式呈報起復。如見喪丁憂者。以親故之日起。聞訃丁憂者。以聞訃之日起。扣算服滿。令本員於服滿之日。即呈明該參佐領。該參佐領於本員服滿五日內。先行出具圖片報部。仍呈明該旗於

據報十日內咨報吏部。准其起復銓選。不得於未滿之先。及原行走衙門呈報。如先期呈報及遲延者。查議。○又奏准。官員有於丁憂後。未服滿前。始得官職者。得官之後。即將丁憂緣由補報。如得官時已屆服滿。即照例呈報起復。並將丁憂月日。及彼時未得官職。是以未報丁憂緣由。於服滿供結咨文內聲明。准其起復銓選。○又奏准。官員起復。有服滿赴補。併文咨報者。應據文先查覈服滿辦理。准其起復。免其重取文結。○又奏准。官員有在籍呈報服滿後。即行赴

部候選。到京後。始知服滿。文被駁。飭察議者。准該員就近將違礙緣由。據實聲敘。及本身應議職名。取具同鄉京官印結。赴部呈明辦理。○六年。議准吏員供事出身人員。丁憂起復。均飭令由現入寄籍咨報。如有已回祖籍者。應仍由祖籍咨報現籍。再由現籍給咨赴部。不得徑由原籍赴選。以杜弊混。○九年。奏准丁憂官員。無論由何處報丁。惟先經入籍該省報部有案者。准其在寄籍呈報服滿。如未經入籍報部有案者。概不准其在寄籍起復。仍飭令在原籍另報。○

又奏准官員丁憂業經咨報到籍服滿來京後知服滿文被駁准該員就近取結呈明仍照舊例辦理外其咨文內並未聲明到籍日期凡有取具同鄉京官印結在部聲明到籍日期呈請起復者概不准行總俟原籍咨文到部報明到籍日期及服滿文內聲明到籍者方准其起復○十年奏准官員服滿文結俱將該員三代姓氏年歲存歿逐一註明其有父母祖父母年至七十八十以上該員是否獨子應否終養詳細聲敘家有次丁侍養者即准其起復銓選無次

丁侍養者。即取具終養供結送部。若文結內漏未填註。暫停起復。俟查覆到日。再准其起復銓選。仍查取遺漏職名議處。○又奏准官員服滿文到部。除原未呈送供結者。仍照舊例暫停起復外。其有已取而漏未送部。並應駁飭另行咨部者。查文內如已註明三代姓氏年歲存歿。有無次丁等項。仍應先准其起復。如文內亦漏未聲敘明晰。即暫停其起復。俟取送到日。再准其起復銓選。○又奏准官員丁憂起復。俱令於供結咨文內。填註具呈轉詳年月日期。如係本員

遲延即將本員職名付考功司議處如係地方官遲延即將地方官職名付考功司議處○十九年奏准現任官員呈報服滿有因報丁遲延先經駁查尚未咨覆者服滿文到部如覈明年月日期相符准其先行起復付選仍查取報丁遲延職名議處如候補候選及分發試用官員並無實缺報丁遲延服滿到部時查明年月日期相符亦即准其起復付選○又奏准官員服滿咨文內聲明已取具該員親供甘結出咨時遺漏未經送部或因供結不妥駁飭另換者服

滿文到部。查文內如已註明三代姓氏年歲存
歿有無次丁等項。應先准其起復。如文內亦漏
未聲敘明晰。即暫停其起復。俟補取到日。再准
其起復銓選。若報丁文內。及親供甘結。有開明
三代年歲存歿。亦准其起復。在部投供人員。並
例不投供之候補候選各官。來京加捐分發。及
赴部候挑者。如服滿文內。未經聲明三代年歲
存歿。亦准就近取具同鄉京官印結。聲明起復。
○又奏准官員出繼為人後者。其本生父母病
故。遭喪者。

或隨侍本生父母任所。或已迎養在墓。或在府見。

以親故之。

日起。在外聞訃者。除路程外。以到籍見喪之日起。在籍聞訃者。以奔喪到某處見喪之日起。扣滿治喪一年。均不計聞。出具親供甘結。由本籍呈報起復。如本生父母在他省病故。其子又不見喪。或到某省見喪。或中途迎柩見喪。或到籍見喪。均須以見喪之日起。扣報一年。服滿。○又奏准。官員服滿文內。未經取有親供及族鄰甘結者。查係報丁時亦無供結。不准起復。付選。仍令補取。到日。再准起復。其或報丁時無結有供。而服滿時無供。有結。或報丁時無供有結。而服滿時無結。有供。又或丁憂時有供結。而服滿時無供結。

或服滿時有供結。而丁憂時無供結。查係合例。均一體准其起復。毋庸補取。亦毋庸再行取結。聲明。○又奏准。八旗現任。及各項候選文職官員。筆帖式。丁憂服滿。本員於五日內呈報時。該旗即先用圖片報部。再補印文。如圖片先到部者。仍俟印文到部。再行辦理。若印文已按限送部。而圖片未送者。即毋庸等候。亦毋庸補取。如呈報在五日以內。並轉報遲延者。均行查議。○同治十二年奏准。八旗在京文職官員。丁憂服滿。已有圖結到部。並無印文。查其年分已久。又將銓補到班者。一面先行辦理。准其起復。按班銓

補。仍催取該旗印文。統限十日內咨部辦理。儻逾十日之限。印文仍未到部。查係本員漏未呈報。即將本員所應銓補之缺。開缺另補。如本員已在旗呈報。而該參佐領漏未呈請咨部。除本員免其開缺外。即將該參佐領等官。查取職名。送部照例議處。儻該旗早已出具印文。確鑿有據。查係書吏舞弊。遺漏隱藏。即將書吏分別送部治罪。從嚴懲辦。○又奏准。揀選舉人。截取到班。或由舉人保舉官階。來京候選。並援例赴挑。分發人員。遇有服滿文結。並未分咨到部。該員

等取具同鄉京官印結赴部呈明。應即行查禮部。如有原籍咨報服滿文結。或曾經呈報服滿。准其會試者。均准其起復。僅禮部查無服滿文結。並未准其會試者。仍不准起復。俟原籍服滿文結咨送到部。再行辦理。○光緒七年奏准。官員在籍見喪丁憂。及在外聞訃丁憂。並隨侍或迎養見喪丁憂。已經奔喪扶柩到籍。屆服滿時。適又游幕探親。措資就醫來京者。除籍隸順天府屬。服滿仍由該府呈報咨部起復外。其餘各省官員服滿。准其備具親供。取具同鄉京官印

結赴部呈報。查係在籍丁憂。已據報丁。在外丁憂。已據咨報到籍。並均取具族鄰甘結。咨部有案者。准其起復。係候補試用人員。給照回省。候選人員。移付文選司銓選。如丁憂後。並無報丁。及咨部到籍日期。族鄰甘結案據。仍不准其起復。飭令回籍具報。俟本籍文結到部。方准起復。並查取漏報到籍職名議處。

服滿起文赴部程限。○原定服滿起文赴部程限。在京限一月。直隸。四月。奉天山東。山西。河南。六月。江南。江西。浙江。湖廣。陝西。八月。福建。四川。

兩廣貴州十月雲南一年○順治十一年題准
官員服滿起復違限半年以上議處一年以上
致仕二年以上革職○康熙元年題准官員服
滿患病該巡撫布政使司即將本官患病情由
取具地方官印結咨部註冊若未經先咨者照
違限例議處○三年題准服滿起復違限一月
以上罰俸一年二月以上降一級調用三月以
上革職○又題准本官具呈之時該地方官即
行咨部若遲延日期除路程外照咨文違限例
分別議處如未呈報及接任官不知情者免議

○又題准官員領文赴部中途患病暨實係因事遲誤者。取具該地方官印結免議。○九年議准。凡服滿起復官員。照地方遠近除路程外。違限半年以上者。免議。違限一年以上者。罰俸一年。違限二年以上者。休致。○嘉慶四年奏准。官員起復。遲延二年以內者。先准其起復。再查取遲延職名議處。二年以上者。不准起復。仍查取職名議處。○又奏准。服闋赴部遲延二年以上者。行令原籍督撫查明。是否無故逗遛之處。改照官員告假違限例。分別議處。後再准其起復。